

# «Agì tenor meglia savair e pudair»

Derschaders da la Dretgira chantunala prendan posiziun tar ils svars e sustegnan lur president

DA MARTIN CABALZAR/FMR

■ **La Dretgira chantunala renviescha energeticamain la pretaisa ch'i dettia tar la Dretgira chantunala ina pratica d'adattar posteriuramain dispositiv ed argumentaziuns da sentenzias. Sustegnida vegn dentant la proposta da la cumissiu da giustia dal Cussegl grond da renunziar ad ina reelecziun dal derschader Peter Schnyder.** Sco quai che la vicepresidente *Ursula Michael Dürst* ha orientà davart la collavuraziun cun *Peter Schnyder* e davart ils motivs che han motivà la dretgira avant in onn d'inoltrar ina proposta per destituir Schnyder da ses uffizi damai ch'in'ulteriura collavuraziun cun el na saja betg pli stada supportabla.

## Cooperaziun nunpussavla

Davos questa proposta na sajan betg mo stads tut ils derschaders, mabain era l'entir persunal d'actuariat e chanzlia. La vicepresidente renviescha cleramain la supposiziun che la proposta da destituziun saja vegnida fatga per taschentar il malesser ed ils svars a la Dretgira chantunala. Betg mo la dretgira sezza, mabain er la cumissiu da surveglianza saja vegnida a la conclusiun che Schnyder haja violà grevamain las obligaziuns da ses uffizi. Uschia haja el renvià da prender part dad ina sesida da dretgira gia fixada en in cas da recurs ed haja disfamà las qualificaziuns da ses collegas. Da menziunar saja plinavant era che Schnyder haja laschà

scriver malsaun dapi passa in onn. Las audiziuns fatgas da la cumissiu da giustia documenteschian cleramain che Schnyder haja grondas difficultads da s'adattar a process da lavur standardisads cuminaivlamain e n'haja nagina prontadad da tschertgar da cuminanza ina sentenzia entaifer in gremi collegial. Sia ferma opiniun persunala haja Schnyder strusch mess a disposiziun per in disput giuridic objectiv. Zunt difficultusa saja stada cunzunt era la collavuraziun da Schnyder cun l'actuariat. Crititgada vegn dentant era la tentuta targlinanta da la cumissiu da giustia d'intervgnir.

## Nagina midada d'ina sentenza

Il derschader *Fridolin Hubert* ha infurmà davart l'andament da las proceduras a la Dretgira chantunala. Da principi dettia duas vias d'arrivar ad ina sentenza. U che quai succedea sin via d'ina circulara a scrit u en il rom d'ina cussegliaziun orala. Tar ina decisiun circulara saja usit ch'il parsura e l'actuar formuleschian in sbos da sentenza e mettian alura quel en circularaziun. Sch'i na dat naginas opposiziuns dals conderschaders vegn il sbos declerà sco sentenzia, cas cuntrari pon els prender ina giudicaziun a bucca. Tractaziuns orales han per ordinari lieu en cas pli

cumplitgads sch'il president ordaina gia a l'entschatta ina tala u sch'in singul derschader pretenda quai.

En il cas concret dal cas d'ierta n'haja betg dà tar la tractaziun orala in dispositiv da sentenza, declerà Hubert. Uschia haja quel er betg pudì vegnir midà posteriuramain dal president. La Dretgira chantunala saja da l'avis ch' il parsura haja agì «tenor meglia savair e pudair» e n'haja betg gi intenziuns nunsinceras. Malgrà che Schnyder haja sancziunà oriundamain il proceder haja el refusà da prender part dal process da revisiun.

La procedura penala è anc pendent.



La vicepresidente Ursula Michael Dürst ha dà pled e fatg ier a las medias.